

## Biografia di Bartholomeus Sotero Sneek (Roy)

**Bartholomeus Sotero Sneek (Roy)** a nace na Aruba 22 di april, 1947. Nomer di cariño ta Roy, meester Sneek of meneer Sneek, of maestro. Nomer di Roy su mama ta Martina Lacle naci dia 30 di januari 1930, y su tata ta Jesus Sneek, mihor conoci como Chu naci dia 15 di october 1917, conoci tambe como gezaghebber di Dakota e tempo aya. Coincidencia cu e aña 1917, ta e mes un aña cu Rufo Wever a nace. Roy tin nuebe ruman, esun mayor a fayece despues di tres luna y tin dos mas cu a fayece. Roy ta casa cu Sonia Emma Lande, kende a nace dia 5 di april 1953. Nan a casa dia 15 di october 1976. Nan tin un yiu muhe cu yama Ilona y ta un hurista y un yiu homber cu yama Ryangelo kende ta bombero. Roy ta bin for di un famia musical. Su tata tabata canta y toca guitarra y su mama tabata canta hopi ranchera. E rumannan homber tur ta toca un instrumento y e rumannan muhe ta canta.



### Segun Roy, musica ta su pasion y no ta considera su mes un artista

**Segun Roy nos tin nos hendenan sofisticada aki na Aruba, kendenan por husga riba tur tereno!**

Musica a bira manera un pasion. Roy ta bisa cu e ultimo dies añanan el a siña masha hopi mes! E ta hopi autodidacto y ta bisa semper cu nos tin nos musiconan aki na Aruba, nos hendenan experencia. P'ese y tin biaha Roy ta rabia! E ta protesta bon cla "cu rabia", principalmente ora cu nos ta busca miembro di hurado di pafo! Nos tin nos hendenan sofisticada aki na Aruba, kendenan por husga riba tur tereno! Riba bos, riba letra y melodia, riba areglo, nos tin nos hendenan. Y nos mester keda aprecia nan. E mes a siña hopi di nos hendenan. Y te hasta alumnonan cu tabata haya les di Roy na scol, ta nan ta bira su maestro awor. Por ehempel Federico Martis y Ivan Quandus.

### E bida artistico

Roy a cuminsa canta cu cinco aña den coro di mucha bou direccion di Ad Stenzen na Arubaanse Muziek School. Despues di cuatro aña el a pasa pa De Trupialen y ey el a canta te cu su diescuatro aña. Despues el a pasa pa misa Fatima di Dakota. El a cuminsa canta cu coro, despues el a dirigi coro cu canticanan di un stem. Despues el a dirigi mas tanto pa dos bos, bou guia di Harry van der Putten. E organista cu a traha cune y cu te ainda ta na bida ta Norma Stephens. El a sigui dirigi pa un bos te cu cuatro bos y coro mixto cu ta ensera alto, soprano, tenor y bass. Roy a yega di dirigi otro coronan tambe. Despues el a bay biba na Hulanda, na unda el a bay den

coronan grandi, manera esun di St. Martinus Kerk. E coro ey, tabata canta cuatro bos y Roy tin un LP cu nan a graba. E tabata practicamente den coro di dos misa pareu. Den St. Janskerk, Roy tabata jeugdleder di un grupo di muchanan di 14 pa 17 aña. El a yega di haya un condecoracion (oorkonde) di nan tambe. Pero na mesun momento Roy tabata den coro mixto di St. Martinus cu ta canta puro Latin. St. Jans Kerk tabata mas tanto misa canta na Hulandes. Na De Trupialen (Aruba), Roy tabata haya les Gregoriano di Frère Alexius, for di un buki masha grandi mes. Na St. Martinus Kerk tambe tabatin un coro masculino cu tabata canta Gregoriano. Eyden Roy a canta



**Roy Sneek despues di 4 aña a cuminsa canta den De Trupialen**



**Roy Sneek ta dirigi Coro den Misa Fatima di Dakota**



**Roy Sneek su instrumento principal ta guitarra**

coro y consecuentemente el a bira di dos dirigente. Na un dado momento, el a ricibi un yamada urgente na scol door di comision di Walburger Kerk. El a haya un peticion pa e dirigi coro cu “cuatro bos” pa un misa di Pasco. E yamada a drenta fin di november pa e misa di Pasco december. Asina el a yuda y dirigi un coro di ochenta persona pa e misa di Pasco anochi. Y el a bay tremendo! Roy a ricibi hopi elogio pa e bon trabou. El a tuma les di musica na Gehrels Instituut na Nijmegen, cu ta uza un sistema propio di duna les y a haci examen adelanta pa por regresa Aruba. Te cu awe Roy ta aplica loke el a siña, por ehempel e solfeo ora e ta dirigi, of toca e melodia riba su guitarra cu ta su instrumento principal. Esey ta en breve trayectoria di Roy.

## Dedicacion y estilo musical

A dedica mas tanto riba nos wals, mazurka, ranchera y nos tumba. Roy ta keda skirbi tumba den 2/4 segun tradicion di Aruba y no 6/8 manera ultimo tempo. Esta e manera di Rufo Wever y Padu Lampe, dus cu e triool, ta-ta-ta, ta-rap. E ta toca tambe bolero, balada y jazz.

## Desaroyo musical

Roy a canta den coro bou direccion di Maybeline Arends-Croes. El a canta tambe den coro di Santa Anna di Noord bou direccion di Tica Giel. Tambe el a participa den coro bou direccion di Efraim Couthino. El a presenta den coro na Hulanda y a fungi como dirigente tambe. Na Merca, ora el a bay studia como piano-tecnico, el a dirigi coro tambe pa e misa di Pasco anochi. El a yega di participa como cantante na

un festival di Dia di Mama na IOWA cu un cancion cu Juancho Ignacio mester a canta. Frank ruman di Roy a compone e cancion y na final Roy a gana e festival aki tambe! Roy ta fungi hopi como presidente di hurado pa festivalnan pa hopi aña y ta hopi stricto pa loke ta e criterionan, rekisitonan y ta gusta traha di adelanta pa loke ta e draaiboek (guion) di e festival pa cada cancion, cada cantante y instrumentacion.



**Roy Sneek satisfactoriamente a completa curso basico di piano tuning, regla y Repara na New York**

## Instrumento musical




Roy ta toca cuatro, y tin tur cinco grado di Instituto Venezolano, pero su instrumento ta principalmente guitarra. Roy a cuminsa na un manera autodidacto y despues a bay les cerca di Eric Tehong. Ta ey, el a bin haya sa mas di notanan musical. Pero Roy tabata lesa noot pa guitarra caba y tambe e tabata dirigi coro caba. Asina el a logra haya su diploma clasico gitaar A. Na cas e tin cinco guitarra y seis cuatro.



**Cuatro**

## Grabacionnan realisa

Roy tin diferente grabacion realisa, sea cu orkesta, guitarra of cu cuatro na Cas di Cultura. E tin grabacion di Don Ramon (dfm) y Erica Giel kendenan a canta cu orkesta. E tin grabacion di e cd di e muchanan di cuatro pa seis aña. Roy tin tambe cuarenticinco cancion graba di maestronan di scol preparatorio (kleuterleidsternan) cu cancionnan original! E tin misa graba dia cu misa Fatima a cumpli setenta aña, caminda Tele Aruba a graba. E grabacion di e cd pa muchanan a keda graba den studio di Robert Thiel. E grabacion na Tele Aruba di e curso siña toca cuarta cu a dura un aña, y tin e riba VHS tambe.



## Acontecimentonan cu ta considera mas importante den e bida artistico

Roy no ta considera su mes como un artista, pasobra segun e, un artista ta duna presentacion tur siman. Pero, Roy semper ta haci su parti musical mas miho cu ta posibel. Como dirigente sigur ta sintie bon, pero no ta considera su mes un "showman". Musica a bira un pasion pa Roy. E ultimo dies aña el a siña masha hopi mes, pero den un forma hopi autodidactico. E acontecimiento cu e ta considera importante ta dia cu e mester a

dirigi coro net tres siman prome cu Pasco na Hulanda, pakiko, pasobra e dirigente di e coro a sufri di un ataca di curazon. Na Merca ora el a bay studia pa piano tecnico, nan a yama prensa, pasobra Roy tin e mesun number cu e inventor di piano esta Bartolomeo Cristofori. Roy a sinti su mes hopi honra. Tempo e tabata docente tambe na Hulanda, door di embehecimento (vergrijzing) den e municipio, a opta pa duna Roy su retiro.

E motibo tabata como esun cu drenta ultimo mester bay prome. E directiva di scol y comision a bay te Den Haag pa protesta den temporada di invierno. Dia 22 di december cabesante di scol a bin cu bicicleta te na su cas den sneeuw y ora hagel ta cay, pa informa Roy cu e mag di keda como docente. Esaki a haci hopi impacto riba trayectoria di Roy como docente y dirigente di kinderkoor. Ta dushi pa bo sa cu



## Sugerencia pa futuro generacion

Roy ta kere cu hubentud mester haya su desaroyo musical no solamente na cas, pero na scol tambe! Lastimamente hopi biaha bo ta tende cu no ta canta mas na scol. Bo ta tende cu e muchanan ta siña for di un cd cu e cosnan ey, hopi biaha tambe e docentenan mes no ta fuerte riba e tereno aki. Nos cultura musical ta den peliger! Ta p'esey Roy ta keda aprecia nos cultura masha hopi, nos folklore y nos hendenan. Nos artistanan manera Don Ramon, Casin Giel, Bernadina y Cecil Growell, Tirso Steba, Tico Quilotte, ya hopi di e generacion hoben nos sa ken nan ta. Pero Padu, Dios gracia cantidad di hende conoce y ta aprecie! Roy ta desea cu por revisa e buki "Nos ta Canta" y introducie na tur scolnan basico, principalmente pa tweede y derde klas. Roy ta conseha pa e hobennan bay les di musica y siña lesa musica tambe.